

deildar. Forstöðumaður skal að jafnaði uppfylla hæfisskilyrði prófessors í hagfræði. Rektor setur forstöðumanni erindisbréf.

Forstöðumaður annast daglegan rekstur stofnunarinnar og sér um framkvæmd á þeim málum, sem stjórnin felur honum.

Um ráðningu annars starfsfólks fer eftir ákvæðum reglna fyrir Háskóla Íslands. Sé um að ræða ráðningu í starf og ekki er gert ráð fyrir því starfsheiti í reglunum, fer stjórn stofnunarinnar eða forstöðumaður í umboði hennar með ráðningarmálið.

8. gr.

Fjármál.

Tekjur Hagfræðistofnunar Háskóla Íslands eru eftirfarandi:

- a. framlag frá viðskipta- og hagfræðideild,
- b. framlög frá öðrum deildum háskólans ef því er að skipta,
- c. styrkir til einstakra verkefna,
- d. greiðslur fyrir þjónustustarfsemi,
- e. tekjur af útgáfustarfsemi,
- f. aðrar tekjur, t.d. gjafir og framlög úr ríkissjóði eftir því sem kveðið kann að vera á um í fjárlögum.

Reikningshald stofnunarinnar skal vera hluti af reikningshaldi háskólans. Fjárhags-áætlun skal kynnt og lögð fram til samþykktar á deildarfundi.

Sé um að ræða útselda þjónustu, sem veitt er í samkeppni við einkaaðila, skal sú starfsemi fjárhagslega afmörkuð frá öðrum rekstri stofnunarinnar og þess gætt að sá rekstur sé ekki niðurgreiddur með öðrum tekjum, í samræmi við ákvæði samkeppnislaga.

Um stjórnunar- og aðstöðugjald af sértekjum fer eftir ákvæðum 72. gr. reglna fyrir Háskóla Íslands.

9. gr.

Reglur þessar, sem háskólaráð hefur sett á grundvelli heimildar í 2. mgr. 9. gr. laga nr. 41/1999 um Háskóla Íslands, sbr. 27. gr. reglna nr. 458/2000 fyrir Háskóla Íslands, öðlast þegar gildi. Jafnframt fellur úr gildi reglugerð nr. 188/1989 um Hagfræðistofnun Háskóla Íslands, sbr. 1. mgr. 130. gr. reglna nr. 458/2000.

Háskóla Íslands, 24. september 2001.

Páll Skúlason.

Þórður Kristinsson.

REGLUR

**um úthlutun tímabundins fjárstuðnings til sveitarfélaga
sem sameinast um rekstur eldvarnaeftirlits og/eða slökkviliðs.**

1. gr.

Markmið með reglum þessum er að auka samvinnu sveitarfélaga, einkum þeirra smærri, um rekstur eldvarnaeftirlits og/eða slökkviliðs í því skyni að auka samræmingu, virkni og hagkvæmni slökkvistarfs í landinu.

2. gr.

Á árunum 2001 til 2005 er Brunamálastofnun heimilt að veita þeim sveitarfélögum tímabundinn fjárstuðning sem sameinast um rekstur eldvarnaeftirlits og/eða slökkviliðs.

3. gr.

Styrkhæft samstarf sveitarfélaga, sbr. 2. gr., getur verið með þeim hætti að tvö sveitarfélög eða fleiri semji um sameiginlegt slökkvilið. Sveitarfélagi er einnig heimilt að semja við annað sveitarfélag um að hafa með höndum verkefni og stjórn slökkviliðs að hluta, enda sé um varanlegt fyrirkomulag að ræða. Um slíkt skal gera skriflegan samning sem skal tilkynna til Brunamálastofnunar.

4. gr.

Styrkir sem sveitarfélög geta sótt um samkvæmt reglum þessum skulu einkum vera vegna:

- a. kostnaðar við undirbúning samningsgerðar, þar sem gerð er úttekt á stöðu brunavarna í viðkomandi sveitarfélögum og gerðar eru tillögur um nýja skipan brunavarna,
- b. kostnaðar vegna þjálfunar slökkviliðsstjóra og slökkviliðsmanna vegna nýrrar skipunar brunavarna,
- c. ýmiss tímabundins kostnaðar sem stuðlar að bættum brunavörnum eða leiðir til aukinnar hagkvæmni og hagræðis í brunavörnum sveitarfélaganna.

5. gr.

Umsóknir sveitarfélaga um styrki skulu hafa borist Brunamálastofnun fyrir 31. desember ár hvert og skal stofnunin ljúka styrkúthlutun fyrir febrúarlök árið eftir. Umsókn skal fylgja samningur sem gerður hefur verið milli sveitarfélaganna, sbr. 3. gr., nema um sé að ræða umsókn vegna kostnaðar við undirbúning samningsgerðar. Með umsókn skal jafnframt fylgja ýtarleg kostnaðaráætlun og greinargerð um tilgang fjárfestingarinnar.

6. gr.

Þau sveitarfélög sem hljóta styrk samkvæmt reglum þessum skulu skila greinargerð til Brunamálastofnunar eigi síðar en einu ári eftir að greiðsla styrks fer fram, þar sem gerð er grein fyrir hvernig hann hefur verið notaður. Ef í ljós kemur að styrkurinn hefur verið notaður til annars en til var ætlast, getur Brunamálastofnun gert kröfu um endurgreiðslu styrksins.

7. gr.

Heildarfjárstuðningur samkvæmt reglum þessum er ákveðinn í fjárlögum hvers árs og þarf Brunamálastofnun við ákvörðun styrkja að taka mið af fjárveitingum hverju sinni.

8. gr.

Reglur þessar, sem settar eru skv. ákvæði til bráðabirgða I í lögum nr. 75/2000, um brunavarnir, öðlast þegar gildi.

Umhverfisstofnun, 26. september 2001.

Siv Friðleifsdóttir.

Magnús Jóhannesson.